

✘ Inzenoglât su la jerbe, Pieri Snait al steve fer immobil. Dome il voli si moveve, pontât viers il cîl.

Il nûl che lu faseve mateâ al jere propit intal mieç. Di frut i vevin contât che cjalant fis un nûl, chel si sarès disfat, come il sâl te aghe. Di fat, il nûl si disfave, ma si tornave ancje a fâ sù. Si zontave cun chei dongje, al zirave, al platave un toc di lune par tornâle a pandi pôc dopo, come un intun zûc di frutin.

Ma Pieri al jere fer inte sô posizion, come un cjan in vuaite.

In chel, une brise di aiar e veve cjàpât sù une fuee e la faseve vongolâ tal vueit. Une fuee smatade, che di muarte a jere diventade vive. Un sbuf di svint le veve fate svolâ, frescje e vivarose, nancje che e ves di tornâ propit sul ramaç li che e jere nassude.

Il voli di Pieri nol saveve ce fâ: di une bande al smicjave la fuee che si avvicinave, di chê altre nol podeve molâ il nûl birbant che, di sigûr, al veve capît il dissen perfit che al steve saltant fûr.

Intun acuardi che nancje il plui grant professôr dal mont al podarès sclari, il nûl e la fuee si jerin intindûts bot e sclop e a zuiavin insiemi cuintri Pieri. Al someave propit... Un svindic de Nature.

Ma Pieri no si moveve. Al spietave la fuee che i rivàs drete sul nâs, ma al restave fis cul voli sul nûl.

Al coventave un calcul svelto di cjâf: trop timp mancje al nûl par disfâsi? E trop a la fuee par rivâmi sul nâs? No si sa. Une robe je cierte: se la fuee a ves di rivâ prime e la tiri vie cu la man, o pierdarès la smicje dal nûl e a sarès la mê sconfite. Mai sarà! Mai!

Ma si sa. Mari Nature je grande e no ti fâs mai mancjâ nuie. Di fat, velu un ucielut di chei berechins che ti pivetin intes orelis e ti stupidissin. Velu che al svolete di ca e di la, intun sturniment di gjonde, cuntune contentece mai viodude.

E cussì, cjalant l'ucielut, il voli al veve pierdût il nûl. Pieri Snait, cence plui ecuilibri, al jere colât par tiere. E sore il so nâs, ben planc, si jere poiade la fuee.

No e no, al veve pensât! Trê cuintri un al è masse!

**di Massim Furlan**